



## 阿公屋下側角个蒜果樹仔

還細，最好畚阿姆歸去阿公阿婆屋下。

國小二年生暑假个時節，阿婆就過身咗。該時，佢淨記得阿婆後生擔著心臟病，又中風咗幾年，愛阿公、阿舅、舅姆輪等照顧佢，愛同佢翻身、抹圓身，餵佢食飯、食藥仔。故所，阿婆講話个聲說、行路个格式，佢實在無印象。

阿姆係內埔仔人，阿公屋下就在四線道省公路幹右手析無幾遠就到咗。在禾埕看出去做得看著南來北往个車仔，每張車仔都駛到盡邊，到大地正知，每一個人、每張車仔都係為著生活在無閒。日時在禾埕搞寮會熱到無結煞，佢等細人仔伴無恁意，會邀陣去屋側角个蒜果樹下搞。

該幾頭蒜果樹仔毋係種咗愛摘蒜果來賣，也毋係愛留來自家食，佢們應該係毋知麼人食核个蒜果个子亂擲綻芽大咗。該兜樹仔个樹身無幾高，也無特別整理照顧掖肥，故所打花打盡多，果子細粒毋會甜。毋過，對細人仔來講，在樹底下鑽來鑽去又跋上跋下，就搞到毋知人咗。

在樹下搞份家啦飯仔就做得搞點過鐘咗，挖泥沙、拈細石頭、摘樹葉仔，就開始假詐煮飯菜；最暢个係假飯菜後个真點心，就係咁燈籠花个花蜜。搞核又挖開樹仔下个泥扭蟻公，有个有大人个手巴掌恁長，有个淨手指公恁細咗，扭有幾下條咗就去圳溝仔釣蠟蚋仔。

以前个圳溝水正式蓋鮮，底下看得清清楚楚。蠟蚋仔就屏在圳溝脣，切段个蟻公餵蠟蚋上勾，釣著个蠟蚋又拿歸樹下分雞嫲食。臨暗咗，雞嫲帶等雞子歸雞棲仔，暗晡頭毋單只舅姆煮蓋慘菜請佢等，連雞仔乜加菜！

阿公過身以後，阿舅佢等到外地發展，老屋下就賣分別人咗，還細時節个記憶變成回憶。到今，佢蓋像還鼻得著無熟(xiugˋ)个蒜果跌落地泥該酸酸澀澀臭個味緒，屬於鄉下阿公屋下个味緒……

作者：吳秀梅

### ☆詞彙學習☆

【側角】zedˋ gogˋ：角落。

【綻芽】can ngaˋ：發芽。

【蒜果】son goˋ：蓮霧。因蓮霧與蒜頭形似而得名。

【蠟蚋】lag guaiˋ：小青蛙。

【聲說】sangˋ sodˋ：說話的聲調和語氣。

【屏】biang：躲藏。

【擲】jied：丟。

【雞棲】gieˋ ji：雞籠。

【慘菜】cam coi：豐盛。

### ☆文法學習☆

【無幾遠】moˋ giˋ ianˋ：沒多遠、不遠。「無幾……」意為「不太……」，表示頻率、程度不高，後面加形容詞。「幾」本音為 giˋ，通常弱化讀作 idˋ。另例：無幾高、無幾多。